

Reusegedig

(Of *Continental interface*)

Vroeër was daar.

'n Stad.

'n Stad was daar.

Soldate het die mure

vol gate geskiet.

Hoe skitter die pokmerke

nie in die maanlig nie ...

Soos die klinknaelpak

van Elvis Presley.

O, versiering!

O, dieper betekenis!

Van Berlyn

tot Maputo.

Katanga.

Die flitsende

pangas.

Vroeër was daar.

'n Reus.

Die reus

het 'n groot gebou

vol klein, klein handjies geplak.

Die handjies

was afkomstig

uit Afrika.

Klein, as jy 'n reus is.

Reusagtig, as jy klein is.

'n Kopbeen is al

wat nou van hom oor is.

Swart. Soos silwer.

Sterre. 'n Skitterring.

Van muskiete.

Malaria! Aa, kinders.

Rat-a-tat!

In die sonlig

(sonlig!)

blink die wande

van die M.A.S.

soos die snykante

van diamante.

“Soos ’n sif

het hy gelyk.”

Die lyk.

Van Patrice Lumumba.

O, die klinknaelknoppies.

Blinkertjies.

Versiering. (O, dieper betekenis!)

Van kuns. Wat alles

in die reine moet skik.

Die blyke van iets (enigiets)

is tog so verskriklik.

Skyn die son

op die water.

Dit lyk

of ’n reusagtige kopbeen

in pixels

uit die plaveisel verrys.

Miskien net stigmata?

Die ou meesters.

Hoe líg

skyn hul verf

op die swaar voorwerpe.

En nát.

Rank die spoeg

van die renaissance-honde

op die geskilderde ouwerwe.

Daar is kleikalbasse

wat bak

in die koue dagbreekson van Afrika

vir 'n duisend jaar.

Bly hulle sag.

Verjongingskuur.

Skeurvallei.

Geen vrou vlei haar

só neer

op die tydsones,

soos Afrika.

Haar Janus-lippe.

Dit lê oop

na regs,

en na links.

Vetplante.

Bodemlewe.

O, versiering,

o, grimering!

Die diepste kuns

(Rubens)

is garnering!

Oh, yes, oh yes,

Please, no,

Yes, oh yes,

YES! YES!

Haar gesig wat draai.

Haar wange.

Hierdie passie.

Na links, en na regs.

Soos in die Bybel.

Eers die linker.

Dan die regter.

Dis die geboorte

wat pynlik is.

Gesange.

Prys u Naam,

Janus.

O, versiering!

O, grimering!

Moenie vergeet.

Garnering.

Amerika.

O, paprika!

Aandadig.

Soveel soorte.

Poeiers.

Ingesmokkal.

Liefeling.

Is die naam

van 'n plaas

in Afrika.

Slegs 'n reus tog

vir die Skeurvallei?

Rat-a-tat!

Ap-a-ties.

Miskien het apies.

Die kiem versprei.

Silvius.

Die reus se hand.

Toemaak.

Die waak.

Tula. Tula.

Afgesny.

Die Hand.

Agter alles?

Blare wat dryf.

Klapper.

Strooisuiker.

Sneeu.

Kan dit.

Nog dieper?

Swart.

Afrika.

Waar almal vandaan kom.

Die Oerknal.

Gas.

Vryswewend.

God Almagtig.

Van die omringende.

Die uitdyende.

Kan jy dit ruik?

Parfuum!

Die kern is.

PARFUUM!

M.A.S. = Museum aan de Stroom, Antwerpen-hawe